

**Sulat'i Bulus
kani Pilimun**

Bismillah Sir-Rahman Nir-Raheem

Assalamu Alaikum Warahmatullahi Ta'ala Wabarakatuh

Su nia a sulat na inisulat'i Bulus kanu suled'in sa paginugut a si Pilimun a taw sa Kulusas. Na su dalepa a Kulusas na sakup'a Turkey sa saguna a timpu. Na su kinasulat'i Bulus sa nia na kanu timpu a kinabilanggu nin lu sa ciudad a Ruma. Na nia kahanda ni Bulus sa kanu kinasulat'in sa nia na makapambalingan nin kani Pilimun su ulipen nin a si Unisimu kagina si Unisimu na minawa lu kanu mapulu nin a si Pilimun. Na sabap kanu kinaawa nin na 'gkagilekan sekanin pembalingan kanu mapulu nin a si Pilimun kagina mapakay a imatayan ni Pilimun ka ulipen nin bu sekanin. Na sabap kani Bulus na natawan ni Unisimu su tidtu a salig kanu Kadenan taman sa naisa su paginugut'ilan kanu Kadenan. Nia pan kaped a kahanda ni Bulus na matalima ni Pilimun si Unisimu sa dikena matag ulipen bu ka taliman nin sekanin a suled'in sa paginugut.

Pilimun

Su Salam

¹Saki si Bulus a nabilanggu sabap kanu Isa al-Masih. Su nia a sulat na ebpun sa laki enggu kanu suled tanu sa paginugut a si Timuti.

San pakatumpa sa leka Pilimun^a a pinadtaya nami a tagapeda nami sa galebekan, ²apeg den ni Appia a suled tanu sa paginugut a babay enggu kani Arkipu a tagapeda tanu sa kabpaninindeg kanu Mapia a Tutuma taman den kanu lumpukan nu 'bpamaginugut a pendidilimudan san kanu walay nengka. ³San sa lekanu su da idsan nin a limu enggu kalilintad a ebpun kanu Ama tanu a su Kadenan enggu kanu Mapulu a su Isa al-Masih.

Su Kinadsukul-sukul'i Bulus pantag kanu Salig'i Pilimun

⁴Uman ku seka ibpangeni-ngeni na tatap aku 'bpanginsukul kanu Kadenan a pedsimban ku ⁵kagina nakineg ku su makapantag kanu kapedsalig'engka kanu Mapulu a su Isa al-Masih enggu su kapegkalimu nengka kanu langun nu 'bpamaginugut.^b ⁶Na nia ku ibpangeni-ngeni na sia kanu ukit a kasabut'engka kanu langun na mapia a inenggay sa lekitanu a lusud kanu Isa al-Masih na kadsisinggumanan nengka su kapangalimuan nengka a unga nu kapedsalig'engka. ⁷Manga dua na suled, su limu nengka na sangat a nakagalaw sa laki taman sa migkabagel su atay ku kagina pinagkapia nengka su manggiginawa nu 'bpamaginugut.^b

Su 'Bpangenin ni Bulus makapantag kani Unisimu

⁸Kagina ka maitu na sabap kanu bagel a nakasangan sa laki nu Isa al-Masih na mapakay a benal a sugun ku seka sa u ngin i dait a enggulan nengka ⁹ugaid'a sabap sa ipegkalimu ku seka na 'bpangeni aku den sa leka. Na saki si Bulus a sinugu^c nu Isa al-Masih a sia sa bilanguan saguna sabap kanu Isa al-Masih, ¹⁰na pakapangeni aku sa leka makapantag kani Unisimu a nabaluy a wata ku sa paginugut sa kanu kinabilanggu ku a nia. ¹¹Kanu paganay na dala pakangguna ni

^a 1:1 Pilimun na basa a Grik a nia nin maena na *malimu a taw*.

^b 1:5, 7 'bpamaginugut Sa basa a Grik na *hagios*, nia nin maena na *manga ikelas a taw*. Su langun nu 'bpamaginugut kanu Isa al-Masih na initimbang'u Kadenan sa ikelas sabap kanu Isa al-Masih. Kagina ka maitu na tinawag a ikelas su 'bpamaginugut.

^c 1:9 sinugu Su nia a kadtalu sa basa a Grik na dua timan i maena nin. Ika-isa na *sinugu* a nia nin maena sa basa a English na *ambassador*. Ikadua a maena nin na *matua a mama*.

Pilimun

Unisimu^d sa leka ugaid'a saguna na aden den makangguna nin sa lekita dua. ¹²Papembalinganen ku sekanin san sa leka, na sangat a pinadtaya ku sekanin. ¹³Na apia ka maitu na nia ku 'gkalilinian na sia demun sekanin sa laki ka asal'a su kapedtabang'in sa laki na timbang a seka bun i pedtabang sa laki sa gagalu na sia aku pan sa bilangguan sabap kanu kabpangusiat ku kanu Mapia a Tutuma. ¹⁴Ugaid'a di ku enggulan i entu amaika di ka makaayun kagina di ku 'gkalilinian i mapanegel ku seka sa kadtambang'engka sa laki ka nia ku 'gkalilinian na senep sa atay su kanggula nengka sa entu.

¹⁵Na aden a entu na nia sabapan a kinapitas'in sa leka gagalu na asal'a kanu kambalingan nin na madtagapeda nengka sekanin taman sa taman ¹⁶sa dikena matag ulipen bu ugaid'a suled'engka a papedtayan. Pinadtaya ku sekanin ugaid'a labi i kapadtaya nengka lun sa dikena matag ulipen bu ka suled ta sia kanu Mapulu a su Isa al-Masih. ¹⁷Na kagina ka ipedtimbang aku nengka sa tagapeda nengka sa galebekan na talima ka sekanin sa mana bun saki i pedtaliman nengka. ¹⁸Amaika aden nganin-nganin a manga kalugian nengka sabap sa lekanin atawa ka manga utang'in sa leka na sia ka den pangetuk sa laki. ¹⁹Saki si Bulus a sinemulat demun kanu nia a "Saki mismu i mayad lun." Di den dait a labiten ku pan i sabap sa laki na natawan nengka su tidtu a lalan. ²⁰Manga dua na suled, benal man a mapia amaika aden makangguna nengka sa laki sia kanu Mapulu a su Isa al-Masih. Pagkapia ka pan su manggiginawa ku a lusud'engka sa tian sia kanu Isa al-Masih.

²¹'Gkatalanged ku a benal i inggulalan nengka su nakadalem kanu sulat ku a nia enggu katawan ku bun i subela pan su kanggulalan nengka lun. ²²Nia pan liu sa entu, na pagadili aku nengka sa bilik a katumpun ku ka 'gkainam ku i pambalinganen aku nu Kadenan san sa lekanu sia makanggulalan kanu kabpangeni-ngeni nu sa laki.

²³Pedsalamen ka ni Ipapras a nia a tagapeda ku bun a bilanggu sabap kanu Isa al-Masih. ²⁴Pedsalamen ka bun nu manga tagapeda ku sia sa galebekan a mana si Markus, si Aristarkus, si Dimas enggu si Luk.

²⁵San sa lekanu su dala idsan nin a limu nu Mapulu a su Isa al-Masih.

Wassalam

^d 1:11 Unisimu na basa a Grik a nia nin maena na *makangguna*.